

A *rubá*

A *ntaño*

SAVANETA 10 AÑA DESPUES DI PLAYA

Pa intercession di pastoor Hendriks nan a traha e caminda di asphalt, cu no tin otro nomber cu "caminda principal", na anja 1939. E caminda ta pasa mei-mei di e pueblo Savaneta, y for di e tempo ey e caracter di Savaneta a cambia por completo. Cuenta di pueblo trankil a caba. Henter anochi, hasta te den mardugá, autonan ta pasa cu velocidad enorme. Dispursi (parce) Savaneta no ta "bebouwde kom". Hende cu ta bin biba na banda di caminda principal, no por pega soño te cu na ta costumbra. Tin bez nan no por tende otro ora nan ta combersa. Pero parce cu nan por adapta nan moda di biba. E caminda di asphalt a trece un cambio radical, cu a bira necesario pa e tempo moderno. Su prijs tabata halto si; cuanto accidente no a tuma luga riba e caminda aki!

E di prome accidente basta serio, prome cu e caminda a ser asfalta, a socede na anja 1934. Auto di Dominico Schwengle A-95 a boks cu un truck. Dominico a bay keiro na Santa Cruz cu algun amigo; Jose Bislick, Lorenzo de Mey y Hacobo Arends. Den un otro auto tabata sigui: Candido Kock, Nemencio Koolman y Alfonso van der Linden.

Fiesta na Santa Cruz a cai aden pasobra tabata tin desorden y bringamento, asina ta cu banda di 10'or di anochi nan a yega Savaneta. Dilanti di cas di Foyan Arends e accident a tuma lugá. Dominico a heridá su pia, Lorenzo a kibra dos sleutel-been. Hacobo a perde tur su dientenan y Joe a sinti su lomba. E otronan den e di dos auto a scapa. E cantidad di accident riba e caminda aki, no ta di conta mas.